

羅漢品第十五 有十章

羅漢品者。言真人性脫欲無着心不渝變。

去離憂患	脫於一切	縛結已解
冷而無煖	心淨得念	無所貪樂
已度癡淵	如鴈棄池	量腹而食
無所藏積	心空無想	度眾行地
如空中鳥	遠逝無礙	世間習盡
不復仰食	虛心無患	已到脫處
譬如飛鳥	暫下輒逝	制根從止
如馬調御	捨憍慢習	為天所敬
不怒如地	不動如山	真人無垢
生死世絕	心已休息	言行亦正
從正解脫	寂然歸滅	棄欲無着
缺三界障	望意已絕	是謂上人
在聚若野	平地高岸	應真所過

莫不蒙祐
彼樂空閑
眾人不能
快哉無望
無所欲求